

**Ullormut oqaluuserisassanut nassuiaat.**

(Inatsisartut Siulittaasoqarfiat)

Immikkoortoq 102 aamma 60 ippassaq ulloq 20. oktober 2009-mi angumerineqanngillat. Immikkoortut ullumi ataatsimiinnermi siulliullugit suliarineqassapput.

Immikkoortoq 103-p, Atuarfik pillugu Inatsisartut peqqussutaat nr. 8, 21. maj 2002-meersup allanngortinneqarnissaa pillugu Atuarfitsialammi tuluit oqaasiisa atuartitsissutigineqartarnerat qallunaat oqaasiitulli 1. klassimiit aallartittalernissaat anguniarlugu Naalakkersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuutip siullermeerneqarnissaa pissaaq 11. november aappassaaneerneqarnissaa kingusinnerusukkut aalajangerneqassaaq.

Immikkoortoq 33, Inuusuttut angerlarsimaffiup avataanut inissinneqarsimasut 19-iniit 23-inut ukioqalersimasut annertusakkamik paarineqarallarsinnaanissaminnut inatsimmik tunngavilikkamik neqeroorfigineqarsinnaanissaasa qulakkeerneqarnissaa siunertaralugu, meeqqanik inuusuttunillu ikiorsiisarneq pillugu Inatsisartut peqqussutaata allanngortinneqarnissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut, siunnersuuteqartumik tunuartinneqarpoq.

Immikkoortoq 95-imut, Aalisarneq pillugu Inatsisartut inatsisaat nr. 18, 31. oktober 1996-imeersumut kingornatigut allannguuteqartinneqarsimasumut allannguutissatut siunnersuummut inatsisissatut siunnersuut saqqummiussissullu ulloq 20. oktober 2009-mi Inatsisartunut tunniunneqarpoq, tamannalu tunngavigalugu immikkoortup siullermeerneqarnissaa 2009-mi ulloq 23. oktoberimit 3. novemberimut nuunneqassasoq Siulittaasoqarfiup inassutigaa.

Immikkoortoq 139, Namminersorlutik inuutissarsiorniarlutik aallarteqqaat pillugit Akileraartarneq pillugu Isumalioqatigiissitap misissuisariaqarnera pillugu apeqquteqaat aallaavigalugu oqallinnissamik siunnersuut aammalu immikkoortoq 140, Aanngajaarutinik atornerluisut katsorsartiffissaannik, taassumalu iluani inuusuttuinnarnut naatsorsuussamik immikkoortortaqaarnissaannik pilersitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut, siunnersuuteqartumit tunuartinneqarput.